

四庫全書

史部

欽定四庫全書

西湖遊覽志餘卷十三

明 田汝成 撰

才情雅致

王忠道達錢唐人足一跛家貧賣藥文錦坊兼以卜市博  
究子史百家客至輒談古今滾滾不竭人或以難隱  
詰之朗如也所著有蘭芷集其徒最高者為劉士亨  
其卒也士亨哭之詩云十年負笈遊門下愛我翻於

骨肉輕才劣豈宜居弟子恩深何以報先生春風夢  
斷行柯螳暮雨啼殘隔葉鶯賴有詩家衣鉢在後來  
誰起繼芳聲

劉士亨泰錢唐人號菊莊當景泰天順間隱居不仕詩  
詞為一時絕唱所著有菊莊晚香諸集其湖上暮歸  
詩朦朧馱醉踏殘花柔綠陰中一逕斜日暮歸來問  
童子春衣當酒在誰家豐樂樓詩層樓高處宴王孫  
湖上青山落酒尊三百年來春一夢月明還照湧金

門

陸元偁昂錢唐人號清溪博雅嗜吟詠少遊菊莊之門  
同列率罕及之嘗作宮詞云自捲珠簾放燕歸六宮  
春盡亂紅飛從來艷色多傾國願得君王寵幸稀梅  
花絕句云春到南枝與北枝花開的皪照寒漪何人  
似解相憐意不把東風玉笛吹凡作宮詞皆寫幽怨  
之私而清溪乃終致規諷詠梅花率用吹落事而清  
溪宛轉護惜無忌刻之情可為得詩人溫厚之旨矣

所著有吟牕涉趣窺豹錄若干卷

馬浩濶洪仁和人號鶴牕善詩詠而詞調尤工皓首韋  
布而含吐珠玉錦繡胸腸褻然若貴介王孫也常題  
許應和松竹雙清扇景詞云剪蒿萊曾將雙翠親栽  
旋添成園林佳勝依稀嶰谷徂徠鳳飛過文章燦爛  
蛟騰攫鱗甲龜趺剡節題詩收花釀酒鬚粘香粉袖  
粘苔無人識棟梁之具管籥之才蔭亭臺儘多風月  
清無半點塵埃竿期截六鼇連舉巢堪托孤鶴時來

色瑩琅玕脂凝琥珀笑他門柳與庭槐蕭郎去畢宏  
已老誰富寫生才君看取歲寒三友只欠梅開蓋多  
麗詞也許東溟以為可追蹤康伯可可謂信然又題  
梅花江城引云雪晴閒覽瘦筇扶過西湖訪林逋湖  
上天寒草樹盡凋枯忽見瓊葩光照眼仙格調玉肌  
膚夜空雲靜月輪孤巧相摹海濤圖時聽枝頭啁哳  
翠禽呼縱有明珠三百琲知似得此花無清氣逸發  
瑩無塵想又題許東溟小景昭君怨云路遠危峰斜

照瘦馬塵衣風帽此去向蕭關向長安便坐紫薇花  
底只似黃梁夢裏三徑易生苔早歸來言有盡而意  
無窮方是作者徐伯齡言鶴牕與陸清溪偕出菊莊  
之門而清溪得詩律鶴牕得詞調異體齊名可謂盛  
矣

馬浩瀾西湖十景南鄉子詞蘇堤春曉云烟樹帶鶯啼  
催得紗牕月漸低金鎖嚴城門四扇開齊縹緲樓臺  
影尚迷已有玉驄嘶花露香塵踏作泥可是尋芳人

起早相攜占斷風流向此堤平湖秋月云月似白蓮  
浮水似瑤田綠永流間憶何時曾勝賞中秋一瓣笑  
蓉是彩舟風露冷颼颼水月僊人跨玉虬笑道西湖  
元有對瀛洲却在蓬萊欲盡頭花港觀魚云小港傍  
湖濬花影中間戲錦鱗漁識放生池有禁收綸水暖  
蘋香十里春花憶上龍門猶隔千山與萬津好向碧波  
深處去藏身無數花前憶鱸人柳浪聞鶯云翠浪湧  
層層千樹垂楊颭曉晴兩箇黃鸝偏得意和鳴疑奏

鸞蕭與鳳笙金彈莫相驚正是蘭舟送客行似惜春  
光如畫裏閒情欲別頻啼四五聲三潭印月云潭水  
碧涵天冷浸中宵皓月圓寫出嫦娥真面目嬋娟絕  
勝瑤臺跨鳳仙潭底是龍淵翠戶珠宮玉作田神物  
也耽良夜景蜿蜒抱得明珠喜不眠兩峰插雲云萬  
仞碧峻增華蓋陽明比未能名作擎天雙玉柱相應  
絕頂三更見日升聞說住山僧上界仙人喚得應待  
我秋清遊興動須登試到青雲第一層南屏曉鐘云

金磬罷泠泠風裊鯨音出翠屏柳外高樓花底戶牕  
扃却似楓橋半夜聽僧已了殘經香斷薰爐月滿庭  
百八寶珠間掐遍聲停老鶴松間夢已醒雷峰夕照  
云高塔聳層層斜日明時景倍增常是遊湖船攏岸  
尋登看遍千峰紫翠凝暮色滿觚棱留照溪邊掃葉  
僧鴉背分金猶未了生憎幾處人家又上燈麴院風  
荷云麴院水風涼萬柄高荷掩鏡光露挹翠盤何所  
似瑤漿瀉下波心水亦香花底浴鴛鴦五月西湖錦

繡鄉畫舫採蓮誰氏女紅粧唱得歌聲最惱腸斷橋  
殘雪云雪覆畫闌橋銀背鯨鯢不動搖題柱相如閒  
袖手無慘錯認梅花昨夜飄步步踏瑤瑤猶勝山僧  
立到腰紅日漸高風漸暖旋消添作春波送畫橈湖  
上虞美人詞草芽柔軟花嬌婉日淡香風暖西湖無  
處不風流何況松間蕭寺柳邊樓六橋東畔孤山路  
小小凌波步翠裙深掩鳳頭鞋臨到登舟雙手按金  
釵又小重山詞新水溶溶拍畫橋橋邊千樹柳綠絲

飄杏花香艷海棠嬌知人悶春意故相撩湖裏木蘭  
橈湖堤芳草軟玉驄驕酒旗撩亂開花招愁多少來  
向此中消

馬浩瀾著花影集自序云予始學為南詞漫不知其要  
領偶閱吹劍錄中載東坡在玉堂日有幕士善歌坡  
問曰吾詞何如柳耆卿對曰柳郎中詞宜十七八女  
孩兒按紅牙拍歌楊柳岸曉風殘月學士詞須關西  
大漢執鐵板唱大江東去緣是求二公詞而讀之下

筆略知蹊逕然四十餘年僅得百篇亦不可謂不難  
矣法雲道人嘗勸山谷勿作小詞山谷云空中語耳  
予欲以空中語名其集或曰不文改稱花影集花影  
者月下燈前無中生有以為假則真謂為實猶涉虛  
也今漫摘數首以便展玩云其商調少年遊云弄粉  
調脂梳雲掠月次第曉粧成鸚鵡籠邊鞦韆牆裏半  
晌不聞聲元來却在瑤堦下獨自踏花行笑摘朱櫻  
微揜翠袖枝上打流鶯行香子云紅遍櫻桃綠暗芭

蕉瑣牕深春思無聊雙飛燕懶百轉鶯嬌正漏聲遲  
簾影靜篆香飄惜月前宵病酒今朝有誰知臂玉微  
銷封題錦字寄與蘭翹恨樹重重雲渺渺水迢迢春  
夜生查子云燒罷夜香時獨立簾兒下真箇可憐宵  
一刻千金價啼痕不記行暗滿鮫綃帕蝶宿牡丹叢  
月轉鞦韆架春日海棠春云越羅衣薄輕寒透正畫  
閣風簾飄繡無語小鶯慵有恨垂楊瘦桃花人面應  
依舊憶那日擎漿時候添得暮愁牽只為秋波溜鳳

鳳臺上憶吹簫云淡淡秋容澄澄夜景娟娟月挂梧  
桐愛簫聲縹緲簾影玲瓏彩鳳銜書未至玉宇淨香  
霧空濛涼如水翠苔凝露琪樹吟風匆匆年華暗換  
嗟舊歡成夢芳鬢飛蓬想清江泛鷁紫陌遊驄應念  
佳期虛負瞻素彩感慨相同凝情久誰家搗衣砧杵  
丁東青玉案云平川渺渺花無數明鏡裏孤舟度花  
下美人含笑顧問郎莫似乞漿崔護別久來何暮盈  
盈羅襪凌波步眉月連娟鬢如霧人世光陰花上露

勸郎休去再來須誤個是桃源路中秋鵲橋仙云不  
寒不暑無風無雨秋色平分佳節桂花香散夜涼生  
小樓上簾兒高揭多愁多病閒憂閒悶玉鬢紛紛成  
雪平生不作負恩人惟負了今宵明月九日金菊對  
芙蓉云過鴈行低鳴蜩韻急紛紛葉下亭臯向霜庭  
看菊颺館題糕依然賓主東南美勝龍山迢遞登高  
繡屏孔雀金橙螃蟹銀甕葡萄痛飲鯨卷波濤笑百  
年春夢萬事秋毫問臺前戲馬海上連鰲當時二子

今安在乾坤大容我龐豪四絃裂帛雙鬟舞雪左手  
持螯梅花東風第一枝云餌玉餐香夢雲情月花中  
無此清瑩儼然姑射僊人華珮明璫新整五銖衣薄  
應怯瑤臺淒冷自騷鸞來下人間幾度雪深烟暝孤  
絕處江波流影顚顚也春風銷粉相思千種閒愁聲  
聲翠禽啼醒西湖東閣休說當時風景但留取一點  
芳心他日調羹金鼎落花滿庭芳云春老園林雨餘  
庭院偏惹蝶駭鶯猜薦紅皺白狼藉滿蒼苔正是愁

腸欲斷朱箔外點點飄來分明似身輕飛燕扶下避  
風臺當初珍重意金錢競買玉砌新栽更翠屏遮護  
羯鼓催開誰道天機繡錦都化作紫陌塵埃紗牕裏  
有人憐惜無語托香腮

馬浩瀾有續遊仙詩百首其序曰唐進士曹堯賓作遊  
仙詩飄飄有遺世獨立之志每風清月白之夜輒歌  
數篇既而就枕必夢仙界覺而紀之以詩數凡百篇  
今摘其佳者云玉版金花闊幅箋朝來次第散羣仙

紫皇勅遣騰真誥第一人書第一篇芭園橘裏賭碁  
還暗憶羸時笑解顏兩袖玉塵三百斛拋為瑞雪滿  
人間白榆歷歷見新栽沾沐天家雨露來下界有人  
分指點南箕北斗更中台養馴蒼鹿放蓬山走入烟  
霞喚不還明日羣中尋却易七星符在頂毛間催花  
雨後步天街隨步香雲不浣鞋見牧麒麟成陣過角  
端都挂小金牌玉案珠簾翡翠屏焚香夜誦蕊珠經  
月明鸞背飛瓊過小駐花陰帶笑聽五銖衣薄不知

寒玉洞青春已半闌肌骨非因惆悵瘦惜花那忍摘  
花餐河西昨夜見牛郎說道天田未大穰八萬三千  
修月戶多將玉屑當乾糧雲輶昨夜到瀛洲洲在蓬  
萊欲盡頭莫信麻姑清淺說茫茫弱水接天流侍兒  
扶上紫鸞車一笑相逢萼綠華今夜蕪城好明月無  
雙亭上看瓊花

莫仲璵璠錢唐人號橘隱晚號櫟壽隱居西湖與菊莊  
為詩酒友嘗見其讀史三首其一曰五胡荐雲擾晉

宇如瓜分修蛇與封豕乘時肆妖氛茁彼池中蒲雄  
姿蓋世聞投策渡江表目中無晉君兵威奮烈火玉  
石將俱焚世無曾連子誰能為解紛謝傅運帷幄子  
弟將中軍戰血漂淮水殺氣凌浮雲遂令軒冕士不  
污犬羊羣偉哉淝水捷可方城濮勲吁嗟謝安石後  
世之桓文彼哉清談輩碌碌何足云其二曰趙宋世  
忠厚養士三百年時危不負主繫彼文狀元勤王仗  
大義擐甲相周旋皇天不祚宋白日沉虞淵寧甘珠

壁碎不為瓦礫全碧血濺燕市精光上燭天嗟嗟我  
生晚不得為執鞭手持竹如意擊碎空山巔魂兮渺  
何許涕泗悲茫然其三曰捐生固不易處死尤為難  
孰知龔勝後乃有謝疊山江東一潰散跋涉何間關  
甌閩苦物色國破家亦殘偉哉烈丈夫矢死無生還  
微身豈足惜大義不可奸忠孝亦何物古今稱大閑  
耿耿浩然氣上摩霄漢間誰謂首陽高有志能躋攀  
至今百世下清風激懦頑我讀三上書凜然毛骨寒

當時裸將士胡能不厚顏又嘗瘧疾南屏葉文甫贈  
以碧霞丹服之愈作詩以謝云丹有碧霞者熒熒色  
青銅當其修合時至理妙無窮朱玄列南北龍虎環  
西東煌煌勾陳主黃螭居其中丹成祕金匱什襲嚴  
緘封我衰困瘧疾鍼砭無全功一丸納玄牝百竅潛  
流通沉沉熱惱境灑然濯清風五行復正氣四體還  
冲融夜夢青衣神化為雙玉童揮戈奮來往直上泥  
丸宮瘧鬼伏殘喘巢穴為之空宛如狐鼠輩膽落御

史驄覺來一呵欠色澤神亦充何當獻九重四海濟  
疲癯

沈彥博約錢唐人以邑庠生初為靖安司訓陞福清掌  
教平生以詩名聞湖海間嘗以詩寄劉菊莊云驂騑  
躡青雲文豹隱玄霧出處固有時達人安所遇念子  
富詩書久抱經濟具陸沉閭里間悠悠常韋素春風  
湖上吟夜月松陰步幽懷頗相同無由展良晤浩歌  
伐木章引脰徒延佇相期各努力慎勿歎遲暮明廷

正需賢行看造鵷鷺

劉邦彥英錢唐人號賓山善詩翰當成化間隱居不仕  
遨遊湖山名振遠近其暮春陪陳太常西湖宴集詩  
六橋柳色翠迷津畫舫移遲送酒頻醉眼不知三月  
暮賞心又度一年春鶯諧急管催歌板燕蹴輕花墜  
舞裊年少莫將行樂悞座中半是白頭人同客過湖  
詩山遶重湖寺遶山天留圖畫在人寰路從烏柏林  
邊轉船近黃妃塔下灣歲月祇隨華髮改烟波空付

白鷗閒當歌不耐傳觴促獨俯寒沙照醉顏載酒過  
湖詩寒食清明次第來紫苞紅萼裏池臺東風似與  
人商略最好花教最後開船頭斗酒配雙柑坐聽黃  
鸝漱晚酣湖上有山山有寺人生只合老江南與吳  
西疇西湖飲別詩有約來登湖上亭一天詩思集疎  
櫺東風草色鷗邊綠落日山光鳥外清紅袖舞來花  
欲笑銀罌倒盡客忘形抱琴行樂吾儕事莫待蕭蕭  
兩鬢星春興詩一天微雨送清明歲歲逢春不快晴

近水人家多養鴨依山樓閣早聞鶯子期不用黃金  
鑄顏駟空嗟白髮生惟有東風一尊酒朝朝相對藥  
闌傾答姚公綬詩三載無書托便郵東雲北樹繫離  
愁平生圖史淹清宦到處湖山結俊遊笑我多方藏  
蠟屐尋君幾度起漁舟從來出口皆奇句未許專誇  
趙倚樓次韻姚公綬舟中夜話詩銀燭秋枰對奕棋  
烏絲繭紙更題詩月明隣舫人眠早鼓絕江城漏下  
遲斷飲頓忘犀首樂放懷偏笑虎頭痴朝來欲別應

難別未了山中筍蕨期吳興丘天祐寄劉邦彥詩慚  
愧無瑀報木桃論交惟覺醉醇醪昔年公幹名先重  
今日相如賦最高酒畔吳歌紅線毯袖中章草紫霜  
毫風流更在諸公上日日題詩付薛濤

張天錫錫錢唐人號海觀天才拔萃文雄一時然落魄  
不羈縱情詩酒領天順壬午鄉薦授山西山陰縣教  
諭解官南還湖山諸奇名勝之燕集殆無虛日鯨吞  
海吸青樓紅粉爭相承迎人以鐵崖方之所居為回

祿所燬作四六短疏以干知識云秋風破茆屋尚興  
杜老之悲烈焰燬高堂寧免張生之歎雖云天地為  
家人世本同旅寄其如四海空囊此身無所依棲昔  
也鳩居雖拙猶可歌於斯笑於斯今焉鳥巢既焚正  
謂破我家取我子不能進不能退久類觸藩之羊無  
以居無以處真是喪家之狗胡開口的柳宗元翻道  
黔廬赭居之足賀沒巴臂的陳去非反說祝融回祿  
之意佳又不是魯新宮何必問宋禪竈食於心者自

昔漫云天火破我膽者於今不見人烟五株柳樹燒  
成炭三徑黃花化作灰反風滅火之人久無焦頭爛  
額之客安在夫往者不可諫固謂甌已破矣來者猶  
可追須知鼎取新焉所恨者五車書當不得棟梁八  
韻賦更難充磚瓦作金石聲文章可憑管城子興土  
木工事業須仗孔方兄然釋道尚有化緣儒家豈無  
布施况彼蓋三間殿造七級塔費無限錢不過徼福  
來生何如助數兩銀捐幾錠鈔幹有益事可以揚名

今世禿和尚只化凡夫老癡儒惟求達士曾聞晉將  
軍為戴逵造室頗極富饒宋丞相為康節買居務期  
寬廣何昔賢之好事豈今日之無人敢希輪奐之維  
新聊冀土茨之苟合笑狡兔巧營三窟念鷦鷯志在  
一枝伏願用財於當行施德於不報歡喜心大家齊  
發安樂窩小子必成使我春誦夏絃勝彼朝鐘暮鼓  
貯清風明月於無窮藏奇書異畫於不朽是所望也  
惟善圖之不數月而新居落成所構有望海亭見山

樓育魚軒等數十間前輩之風流仗義可想也

張天錫才華灑落跌宕不羈不經意語往往動人一日  
與客遊湖客指魚叢索賦天錫應聲曰誤入在泥沙  
青山是故家無心棲燕雀有意戀魚鰕春到萍為葉  
冬來雪作花莫教張子見錯認是仙楂

張靖之寧海寧人號方洲景泰天順間為給事中有名  
奉使朝鮮國朝鮮之人雅重之集所著作為刻皇華  
錄成化初忤權要出為汀州知府無何引疾歸田雅

好山水歲率一再至杭州至輒攜親朋出遊西湖訪  
孤山弔岳墳登天竺綵舟蠟屐隨意所之興至呼筆  
大篇短章頃刻立就又善丹青所著有方洲集其秋  
日遊紫陽庵詩石級清懸絕薜蘿洞門深敞野人過  
霜林葉盡羣峰出風岫烟開夕照多誰躡白雲尋鶴  
蛻自摩蒼壁寫樵歌登臨日少歸期促白髮青山奈  
老何題飛來峰詩舞岫翔巒勢薄天巖崖空敞欲飛  
懸詩窮翰墨題難盡畫絕丹青趣不傳浪說此中曾

見佛却疑深處可通仙  
冷泉亭下西風緊  
晚借山房一醉眠  
翠擁螺攢玉作堆  
一峰孤絕似飛來  
龍翔北海蒼鱗重  
鳳落西湖錦翼開  
鬼斧鑿穿生混沌  
神鞭驅出小蓬萊  
石門陰洞知多少  
欲借丹梯上紫臺  
九月初八日霜降  
同友人遊靈隱三  
首  
秋日秋山景色  
微秋來風景解人  
稀  
泉通金水清偏冷  
峰出霜林峻欲飛  
黃葉下封遊客路  
白雲間護定僧扉  
人生晚節須當惜  
暢飲何妨醉夕暉  
昨夜關榆有降霜  
客邊明

日是重陽心驚衰髮添新白眼見寒花是舊黃投老  
怕逢凋落後登高先盡笑歌狂明年聚散何須計共  
擬藍田作醉鄉落日蒼茫石磴斜隔林雞犬是誰家  
烟嵐濃似催詩雨霜葉嬌如笑客花樹裏寒聲分澗  
水天邊晚色過山鴉登臨未盡悲秋興回首嚴城起  
暮笳遊三茅觀詩曾記茅君觀裏遊東風花鳥醉淹  
留丹丘歲晏羽人老碧草時芳蕙畹秋村郭半山雲  
不斷江湖夾地水通流無端却似催詩雨吟得悲風

滿樹頭水光山色雜烟霏綠漾清浮碧四圍籬菊着  
霜人釀酒江風吹雨客添衣閒中宴會時非偶老去  
交遊日漸稀安得良工圖畫去相看日日叙巖扉遊  
淨慈寺詩為愛湖南第一山尋春遠自六橋灣峰巒  
影落空青裏樓殿香生暖翠間乍到只疑天路近因  
過聊借竹房間醉中不記歸時晚笑駐肩輿待月還  
遊紫陽宮詩三月吳山錦繡林清遊聊借此登臨草  
深危磴留迂步花落閒庭入醉吟杜曲文章愁間絕

山陰人物夢招尋青春正好家園近未覺風光負壯  
心吳山春望詩東風吹雨百花晴獨立鰲峰醉眼明  
樓閣盡天山擁寺江湖環地水通城中原故友浮雲  
散南宋諸陵草蔓平日暮長歌下山去蘼蕪滿地伴  
人行留題瑞石山房詩風定雲閒四壁虛萬峰深鎖  
地仙居自疑秦帝停車處人說媧皇補煉餘夜靜龍  
光穿戶牖春深鍾乳落庭除令威去後玄關闕猶有  
山靈守故廬登雲居絕頂詩半村半郭吳山路輕暖

輕寒上巳天梅影過城湖曲寺櫓聲歸浦浙東船舊  
遊詩酒添新客今日風光似去年清賞未闌幽思發  
亂峰斜日起蒼烟題虎跑寺詩蒼苔白石路盤迴林  
谷藏春一徑開山勢北連三竺去泉聲西自五雲來  
春殘野衲和松老風靜閒雲伴鶴回遊賞漸多題詠  
徧不知誰繼子瞻才題石屋詩幽尋隨路問山樵落  
日催人酒未消懸壁有銘鐫往事老僧相見說前朝  
月燈夜落松烟暝雲幕秋虛竹露飄勝境難逢時易

過重來不用鶴書招遊寶所塔詩四首負郭巖扉敞  
石壇上方門逕遶層巒樓觀海日夜先曙竹引湖風  
夏亦寒林外歌聲樵出谷水中人影釣揚竿何當雪  
月烟花候來共山僧信宿看其二會共湖山作主賓  
交歡幾許別離頻東軒長老非生客西郭先生是故  
人黃葉斜陽蕭寺晚綠蕪清渚斷橋春幽期美景長  
相背寒暑興懷白髮新其三懷陳彥章去歲霜晨集  
上方今年仍扣遠公房青山不改故人眼碧草欲枯

吟客腸林借清秋烟亦爽樹涵春煦葉都香為誰獨  
倚危闌立感興無詩憶子昂其四非為逢僧得暫閒  
荷衣早已退朝班雪堂旂蓋多臨水巢屋琴尊不下  
山楊白花飛春鳥亂冬青樹老暮鴉還傷心往事休  
重省千古興亡落照間蘇堤春曉云楊柳滿長堤花  
明路不迷畫船人未起側枕聽鶯啼平湖秋月云風  
靜片雲消寒波浸涼月疑有夜吟人推篷落楓葉花  
港觀漁云圍圍復洋洋茭青露藻香前湖張水戲誰

解步濠梁柳浪聞鶯云  
藜杖憇蘇灣風溫翠漲間驚  
聞雙語鳥如在畫船間  
三潭印月云片月生滄海三  
潭處處明夜船歌舞處人在鏡中行  
南屏曉鐘云幽夢忽驚覺  
嚴城方向晨看花春起早已有曉粧人兩  
峰出雲云南峰雲乍晴北峰雲欲雨  
中有化霖人高眠兩峰裏  
雷峰夕照云爽朗忽蒼茫  
山高易夕陽百年歌舞地  
消得幾昏黃麴院風荷云  
涼氣度方洲香來水正流  
時間採蓮曲不見採蓮舟  
孤山梅雪云春

意逼溪橋寒香閉蓬戶山人不出門驛使在途旅

徐延之伯齡錢唐人號籙冠道人博學強記洞曉音律

工樂府嘗雜集瓷甌數十枚考其音之中度者奏曲

一章茶頃而協所著有蟬精雋二十卷嘗薄遊蘭陵

會邵文敬陸廉伯周克容龔忠夫吹笙鼓琴為樂一

座盡傾遂聯句贈之云擁爐清夜炙銀簧邵仙律和

鳴學鳳凰周應節低昂吾欲舞陸倚歌談笑客成狂

龔重華一去空思往陸周雅無傳孰補亡邵老大忽

逢王子晉

周

緱山回首月蒼蒼

龔

邵文敬復贈以聽

琴詩云坐園香柱石堂寒未覺純香爨後殘飛燕舞  
衣翻玉腕老鮫珠淚滴水盤雲生桂嶺兼春瘴風入  
涇原撓夕湍有客思歸正惆悵關山月白路漫漫末  
句蓋以伸別意也陸廉伯贈之詩云一曲清商思不  
堪泠然如對古人談春明綵鳳初辭穴夜冷遊魚更  
出潭塵壁無絃惟種柳芳林有客悞攜柑臨歧欲問  
將歸意安得微風日日南周克容贈之詩云襟度飄

然物外情行蹤到處飲香名一牀流水伯牙操滿耳  
清風子晉笙文字纂修人盡服古今成敗論皆傾可  
憐當道諸卿相不把封章為賈生頃之延之言歸周  
克容贈之詩云塵機鞅掌我何堪喜對徐卿一笑談  
蹤蹟半生三竺寺品題多付百花潭脂香出金椒燔  
膾春色盈缸酒釀柑明日攜書歸舊隱孤山佳趣勝  
終南廉伯和云年少才情萬事堪倒傾三峽此雄談  
寒雲孤鶴依空谷秋水長虹卧石潭行色遠迷吳苑

樹華燈歸試武林柑春風更有西湖約重聽笙歌驚  
嶺南朱懋陽和云誰謂嵇康嬾不堪喜逢樂廣共高  
談玉笙有譜鳳鳴圓寶劍騰光龍出潭書罷不須臨  
晉帖飲餘常得破霜柑西湖回首經時別知有清名  
在斗南皆一時名筆也

夏時正正成化中以太常寺少卿致仕布政使甯良等  
作西湖書院聘時正主之四方文學雲集時正嘗作  
詩蓬湖中隨風往來作四時詞云放棹蘭汀杜若洲

有詩不用錦囊收儘教拋擲東風裏逝水飛花處處  
流詩成倚棹復嘖呻棹觸風荷躍錦鱗老去都忘擷  
芳意放歌何處採蓮人解纜朝辭學士溝湖中畫舫  
不勝秋白蘋風起回汀晚泊在蘆花淺水頭霜清石  
出水消波景澹烟融入棹歌不似灞橋驢子上滿身  
風雪奈詩何

方思道豪開化人正德間刑部郎中跌宕不羈雅好山  
水居湖最久嘗築室於石屋號齊樹樓少師夏公謹

時為都諫贈之詩云錢唐西湖好林麓白石清泉翳  
修竹吳山有樓出木杪勝處憑高此其獨崇陵野客  
善題詩彩毫落紙無停思偶爾登臨興豪發直欲歷  
覽搜神奇日日出遊湖上寺有時醉臥湖船裏風流  
不減李太白氣岸真同杜子美倚闌拍手一長歌白  
雲飛起青山多石林夜雨泣魍魎潮江秋漲鳴鼃鼃  
胸中萬疊烟霞癖不受人間一塵迫只有看山眼最  
青無奈憂時鬢先白樓中把酒送飛鴻酒醒夢回滄

海東江霞遙映上天竺海日正抱南高峰客來時出  
袖中草江山大半收文藻何日相攜齊樹樓煩君更  
述同遊稿

西湖題詠見於古今者裒之無慮千首而短章孤詠散  
載冗籍者往往可誦試舉其佳者如武塘姚允言早  
春過西湖詩西子湖頭得早春淡烟微雨暗湖濱柳  
枝尚短不着水梅蕊未開先可人老境正憐諸事懶  
風光無奈一番新晴來且整登山屐遮莫鶯花笑客

貧吳興畢天祐遊西湖三竺詩西風衫袖拂烟霞小  
轎舁來穩似車三竺山藏金粟影兩峰天落紫蓮花  
殘雲落日將軍墓鶴怨猿啼處士家惟有湖頭春色  
在紅船烏榜載琵琶又錢唐懷古詩鳳凰山色老秋  
風萬戶笙歌落照中鐵甲屯江潮不上天星落海地  
俱空東南都會衣冠古吳越人家水土同惆悵錢唐  
江上月年年荆棘照遺宮嘉善姚廷輔遊西湖詩何  
處能消白晝閒西湖佳景畫圖間尊前醉客不在酒

眼底可人惟是山十里香風花鵲鵲六橋春色草班  
班雷峰塔畔詩成後載得笙歌薄暮還嘉禾懷用和  
遊西湖次姚桂巖韻詩偷取紅塵半日間朝來移席  
水雲間歌抽象筇敲烏几醉借蛾眉倚玉山水檻曉  
烟催柳色石橋春雨過苔班紅舫落日遊人散載得  
光風霽月還嘉禾姚公綬自錢唐門抵浙江驛望西湖  
諸峰詩不見湖山已七年湖光山色兩依然青鞋自  
踏芙蓉露晝漿誰衝翡翠烟目斷蘇堤新柳外僧歸

竺國舊峰前丁寧春勿堂堂去有待重來醉管絃朱  
夢炎西湖詩萬戶烟消一鏡空水光山色畫圖中瑀  
樓燕子家家雨錦浪桃花岼岼風畫舫舞衣凝暮景  
繡簾歌扇露春紅蘇公堤上垂楊柳尚想重來試玉  
驄湯仲友西湖詩山色湖光步步隨古今難畫亦難  
詩水浮亭館花間出船載笙歌柳外移過眼年華如  
去鳥惱人春色似遊絲六橋幾見輪蹄換取樂莫辭  
金屈卮嘉禾李孟昭題豐樂樓圖詩錢唐城郭帝王

州勝槩千年尚有樓南浦雲開珠箔曉西山雨歇畫  
闌秋玉人歌舞成春夢芳草王孫非舊遊物換星移  
餘事在蕭條殘墨不勝愁又西湖夜宿詩蹇騎衝雪  
岼烏紗夜醉西湖賣酒家十六吳姬吹鳳管捲簾燒  
燭看梅花陳雖過葛嶺懷古詩山上樓臺湖上船平  
章醉酒懶朝天羽書莫報樊城急新得蛾眉正少年  
岑琬錢唐偶成詩畫舫行春醉欲迷湖光好在古城  
西不知悞國人何在楊柳東風鳥自啼清江俞行之

西湖詩西湖湖上可憐春烟柳風花最惱人羅袖淚  
乾無好思畫船歌舞為誰新秋來碧水湛平湖荷葉  
菱花取次枯唯有斷堤殘柳樹淡烟猶鎖亂啼烏方  
虛谷湖堤雨中夜歸詩夜雨昏昏欲雪天數家燈火  
北山前鄉心認作桑麻路忽有湖船奏管絃徐秋雲  
西湖詩涼洗水壺壓兩峰鏡鸞無地覓驚鴻芙蕖池  
館鴛鴦雨楊柳樓臺燕子風玉簫度雲聽似夢畫圖  
浮水望如空斗牛已屬乘槎客何處凌波第一宮楚

石和尚曉過西湖詩船上見月如可呼愛之且復畱  
斯須青山倒影水連郭白藕作花香滿湖仙林寺遠  
鐘已動靈隱塔高燈欲無西風吹人不得寐坐聽魚  
蟹翻菰蒲又贈錢唐張克正詩酒酣合奏琵琶箏無  
限春光付後生織翠裙新驕野服函牛鼎大饜瓊烹  
澗松錯落千尋榦山草扶疎四寸莖頗憶江南風物  
否綠楊影裏畫船橫陸孟昭初夏遊西湖諸山次韻  
詩山寺迢迢湖水東樓臺高出翠微中自慚投社非

陶令却羨能詩有遠公花氣暖浮千嶂雨松聲涼灑  
一欄風穿林怪底多麋鹿十里平坡碧草豐姚公綬  
西湖春曉歌湖水湖烟濃淡裏曙光遙逐春風起不  
知山有幾千峰樹色相連又幾重橋通四百八十寺  
一一相間青芙蓉樓船猶未載簫鼓日高處處添歌  
舞仁和張子興西湖詩誰為鴻濛鑿此陂湧金門外  
即瑤池平沙水月三千頃畫舫笙歌十二時今古有  
詩難絕唱乾坤無地可爭奇溶溶漾漾年年綠銷盡

黃金總不知開州王崇慶為南京戶部尚書慕西湖而未至也作四絕句杭州原說西湖景今望杭州却在興臣妾萬方稱久化太平天子握真符青山碧水來盤古霽月光風屬賞音千古繁華何足道且思雲鳥一論心畫船簫鼓未須聞先問忠貞武穆墳草木有枝仍向主錯教美貌說昭君江山好景幾巡遊尚慮逃亡百姓愁但願萬年明主壽會當四海永歌謳

西湖遊覽志餘卷十三

# 欽定四庫全書

史部

西湖遊覽志餘卷十四

詳校官太僕寺少卿臣李廷欽

編修臣程嘉謨覆勘

總校官編修臣王燕緒

校對官中書臣葉蘭

謄錄監生臣孫廷璧

欽定四庫全書

西湖遊覽志餘卷十四

方外玄蹤

明 田汝成 撰

杭州禪教皆宗天台天台之教始於智者大師大師名  
智顗字德安當梁陳時自荊州華容縣來天台山佛  
隴峰闡明宗旨遠近從之乃建寺曰修禪在昔如來  
因菩薩以普門示現而華嚴肇開至雙林高會無大

無小同歸佛界及大雄示滅教亦陵夷龍樹大士病  
之乃用權略制諸外道發明宗極微言東流惠文禪  
師得之由文字中入不二法門以授南岳惠思今稱  
南岳祖師者是也當時教尚簡密不能廣被及智者  
承之乃開止觀法門導萬法之理而復於實際實際  
者何也性之本也物之所不能復者昏與動使之然  
也照昏者謂之明駐動者謂之靜明與靜止觀之體  
也在因謂之止觀在果謂之智定因謂之行果謂之

成行者行此者也成者證此者也蓋惑足以喪志動  
足以失方於是止而觀之靜而明之使其動而能靜  
靜而能明明則照照則一矣此止觀之所由作也智  
者之在當時學者仰之為指南其視天台猶鄒魯之  
洙泗也

杭州內外及湖山之間唐已前為三百六十寺及錢氏  
立國宋朝南渡增為四百八十海內都會未有加於  
此者也為僧之派有三曰禪曰教曰律今之講寺即

宋之教寺也嘉定間品第江南諸寺以餘杭徑山寺  
錢塘靈隱寺淨慈寺寧波天童寺育王寺為禪院五  
山錢唐中天竺寺湖州道場寺溫州江心寺金華雙  
林寺寧波雪竇寺台州國清寺福州雪峰寺建康靈  
谷寺蘇州萬壽寺虎丘寺為禪院十刹以錢唐上天  
竺寺下天竺寺溫州能仁寺寧波白蓮寺為教院五  
山錢唐集慶寺演福寺普福寺湖州慈感寺寧波寶  
陀寺紹興湖心寺蘇州大善寺北寺松江延慶寺建

康瓦棺寺為教院十刹杭州律院則昭慶寺六通寺  
法相寺菩提寺內外靈芝寺不在五山十刹之列大  
抵僧家以禪那為宗旨而教所以致禪善乎蘇子由  
有言我觀世教師皆謂教是寔由謂教寔故則為禪  
所訶禪雖訶乎教終以教致禪禪若不取教是杜所  
入門教而不知禪是不識家也律則慎攝其威儀而  
涵養其智定禪與教者之所兼資焉

昭慶寺戒壇蓋自國初澄照法慧兩律師奉上命而為

之而登壇授戒嗣其傳者非出部劄故有真戒壇假  
宗師之說皇祖立法無非化民為善之盛意近來遊  
衲往往敗羣以致官府崇禁非立法本旨也洪武五  
年正月十七日皇祖宣諭衆僧云你和尚每出那城  
郭山林村落中將釋迦佛明經教典與他衆民說化  
他一方人民習善不來犯王法也是你出家人為我  
國家添力氣也洪武十一年正月二十一日皇祖宣  
諭衆僧云如今為僧的多不通曉佛法都要習學心

經金剛經楞伽經晝則講說夜則禪定以深通佛法  
為長其次依戒鴈行坐違者論罪自是每歲三月三  
日本寺開設戒壇海內縑流雲集而民間好善者亦  
皆皈依聽說佛法壇上設法座推其能通經典戒行  
高潔者升座談經陳具足戒僧徒俯聽或叅究疑難  
從問條解人授戒牒一紙其文云佛法三藏以經為  
首三學以戒為先戒者寔三寶之舟航衆聖之街衢  
也論其行相則有二百五十之殊究其威儀則有三

千八萬之別佛佛相授祖祖相傳持之則為三乘證  
聖之基犯之則為六道沉淪之本三世諸佛因此戒  
而證涅槃一切菩薩由此戒而成正覺是知究佛心  
者謂之禪非戒不明宣佛語者謂之經非戒不尊故  
戒為萬行之首衆德之源者也其五戒曰不殺生不  
偷盜不邪淫不妄語不飲酒其十戒則益之以不着  
花鬘纓絡香油塗身不歌舞戲娼妓不坐高廣大牀  
不非時食不捉生像金銀錢寶又具足戒一百五十

條皆載牒文得之者若士人之應舉中式云

戒牒本作戒蠟西域番僧結制之日秤其身若干觔即以蠟為身亦若干觔解制之日再秤之若身重於蠟即為得道蠟重於身則學敗矣蓋制中拘窘鮮食寡睡淡薄強忍非寧定者不肥也

佛書浩瀚罕求宗旨吾於杭州得三僧焉其言雖近易而樞要可窺矣圓修居鳳林白樂天從問佛法大意修曰諸惡莫作衆善奉行樂天曰三歲孩兒也解恁

麼說修曰三歲孩兒雖說得八十老翁行不得囊中  
居虎跑嘗示衆云說得一丈不如行取一尺說得一  
尺不如行取一寸宗杲居徑山嘗對宋仁宗曰瞥起  
是病不續是藥不怕念起惟恐覺遲如此數語不幾  
於近道者乎

玉泉寺者曇超遺跡也僧史稱其居靈苑山一定累日  
忽見一人來禮曰弟子赤亭山土神也村民鑿山壞  
龍室羣龍忿誓三百日不雨今已百日田池枯涸欲

屈救蒼生超許之乃至赤亭為龍祝願龍亦悔悟化  
人見禮於超明日大雨

駱賓王之敗也落髮靈隱寺中人無識者宋之問遊寺  
月下遶廊吟曰鷲嶺鬱嵒堯龍宮鎖寂寥數過不徹  
有一僧對長明燈坐大禪床問曰少年何事苦吟之  
問曰欲題此寺而思不屬僧曰何不云樓觀滄海日  
門對浙江潮之問驚喜遂為終篇云桂子月中落天  
香雲外飄捫蘿登塔遠剝木取泉遙霜薄花更發冰

輕葉未凋夙齡尚遐異搜對滌煩囂待入天台路看  
予度石橋遲明訪之已不見矣人始知為駱賓王也  
會通者姓吳名元卿唐德宗朝為六宮使方春韶花卉  
盛發翫賞移時因感悟自是忽忽不樂帝怪而問其  
故以願從釋為對遂放歸錢唐見韜光韜光令謁烏  
窠鳥窠為祝髮服勤數年未蒙印授一日告辭鳥窠  
曰汝何往曰諸方學佛法去曰若是佛法吾此亦有  
少許曰如何是佛法鳥窠於身上拈起布毛吹之通

即豁悟不復他行世號布毛侍者今招賢寺乃通道場

續空者吳人本齊君房也苦貧力學為凍餒所驅唐元和初游錢唐至孤山寺饑卧莽中有胡僧顧君房曰法師旅況諳否君房拭目而應曰汝何為者僧曰子不憶講法華經於洛中同德寺乎探囊中出一棗如拳曰食之能憶過去未來事君房食訖而寐頃之乃悟昨講經事遂落髮孤山寺中

寶達者晦跡靈隱山號刹利法師善持秘呪晉天福時  
浙江水溢激射湖山寶達誦呪止之夜有偉人黑冠  
朱衣謂達曰伍員復求雪恥爾師慈心為物員聞命  
矣自是潮擊西興而杭州東岬沙漲數里至今靈隱  
寺有印沙床照佛鑑皆其遺跡也

布袋和尚者在奉化縣岳林寺嘗皤腹以杖荷一布袋  
凡供身之具盡貯袋中隨處偃卧天將雨即着濕草  
履驟行途中遇亢暘即曳高齒木屐豎膝而睡梁貞

明三年於寺中東廊石上端坐而逝今杭州諸寺皆塑其像撫膝袒懷開口而笑荷布袋於傍蓋僧家藉此以示雲遊之狀為募化之資耳岳肅之珂嘗贊其像曰行也布袋坐也布袋放下布袋多少自在

文喜禪師初叅仰山山令典常住一日有異僧求齋食喜減已分饋之山預知問曰適來果何人汝給食否答曰輟已回施山曰汝大利益一日定中見文殊跨獅子緣甕側喜訶曰文殊自文殊文喜自文喜遂掌

之文殊湧空曰苦瓠連根苦甜瓜徹蒂甜修行三大  
劫却被老僧嫌尋止杭州千頃寺次住仁王寺光啓  
三年錢王請住龍泉廨署大順元年錢王表薦賜紫  
乾寧四年又奏加號曰無著是年十月告衆曰三界  
心盡是涅槃言訖跏趺而終壽八十塔於靈隱西塢  
天祐二年叛兵廢師塔觀肉身不壞髮爪俱長武肅  
王竒之遣裨將重封瘞

慧覺者德清人出家靈隱寺讀書強記辭辯縱橫人莫

能屈宋初徵入汴京為僧錄太祖行香至相國寺問  
曰朕見佛拜是不拜是對曰現在佛不拜過去佛太  
祖大喜遂為定禮時有安鴻漸者好嘲詠嘗街行遇  
贊寧偕數僧鴻漸指嘲曰鄭都官不愛之徒時時作  
隊贊寧應聲曰秦始皇未坑之輩往往成羣時皆善  
其捷對然鄭谷非不愛僧但不愛僧官耳故其詩曰  
愛僧不愛紫衣僧而蘇子瞻之贈慧勤罷僧職也亦  
云軒軒青田鶴鬱鬱在樊籠既為物所縻遂與吾輩

同今來始謝去萬事一笑空則僧以官名誠非出世法也

徐常侍鉉仕江南日嘗襍被入直澄心堂至飛虹橋馬輒不進裂鞍斷轡筆之流血掣韁却立鉉貽書贊寧贊寧答曰下必有海馬骨水火俱不能毀惟漚以腐糟隨毀者是也鉉斲之去土丈餘果得巨獸骨上脰可長五尺膝而下長三尺髀骨若段柱然積薪焚三日不動以腐糟纔漚之遂爛焉徐諤嘗得畫牛一副

畫齒草欄外夜則歸卧欄中持以獻後主煜煜獻之  
宋太宗以示諸臣無能辯其理者贊寧曰南倭海水  
或滅灘磧微露倭人拾方諸蚌腊中有餘淚和色著  
物則畫隱夜見沃焦山時或風燒飄擊有石落海岬  
滴水碧色染物則畫見夜隱此牛二形殆二物所畫  
也

貫休者以詩謁錢武肅王云貴逼身來不自由幾年辛  
苦踏山丘滿堂花醉三千客一劍霜寒十四州萊子

衣裳宮錦窄謝公篇詠綺霞羞他年名上凌雲閣豈  
羨當時萬戶侯王愛其詩遣客謂曰教和尚改十四  
州為四十州方與相見休曰州亦難添詩亦難改聞  
雲孤鶴何天不可飛耶飄然入蜀

契盈者閩僧也從吳越王登淶波亭王曰三千里外一  
條水契盈云十二時中兩度潮人以為切對蓋其時  
兩浙貢賦自海路至青州登陸故云三千里

真觀者姓范氏錢唐人父母禱佛而生左掌有仙文右

掌有人字居靈隱石室戒行精高祈禱輒應嘗作愁  
賦為詞人所稱隋開皇十四年白衆而逝有塔在東  
岡宋王欽若重修

道誠者錢唐人居月輪山號慧悟大師天禧中撰釋氏  
要覽三卷又注王勃所撰釋迦成道記丞相王隨知  
杭州日亦友之余弼題慧悟禪師上方詩云孤峰牢  
落幾何年臺殿於今挿半天已是精藍誇絕徼更將  
寶塔在危巔烟霞色任陰晴變鐘磬聲隨上下傳珍

重老僧無別境一生幽趣只山川

遵式者姓葉字知白其母乞靈於觀音遂生式學行孤  
高博習教觀苦學嘔血兩足皮裂式願力堅固以死  
自誓建下天竺寺著淨土懺法金光明觀音諸本懺  
儀行於世故號慈雲懺主王冀公欽若鎮金陵以書  
致遵式式將謁公過林逋逋以詩送之云虎牙熊軾  
隱鈴齋棠樹陰陰長碧苔丞相望尊賓謁少清言應  
喜道人來

慧勤者餘杭人居孤山聰明才智能詩文廢歷間遊京  
師二十年請造公卿聲華歛起歐陽永叔勸之使歸  
作山中樂三章極道林泉間事以動蕩其心而卒反  
之正其詞曰江上山兮海上峰藹青蒼兮杳巘叢飛  
霧散兮邈乎青空天鑱鬼削兮壁立於鴻蒙嵯懸磴  
絕兮險且窮穿雲渡水兮忽得路而不知其深之幾  
重中有平田廣谷兮與世隔絕猶有太古之遺風泉  
甘土肥兮鳥獸雝雝其人麋鹿兮既壽而豐不知人

間幾時兮但見草木華落為春冬嗟世之人兮曷不  
歸來乎山中山中之樂不可見兮子其往兮誰逢其  
二丹英翠蔓兮巖壑玲瓏水聲聒聒兮花氣濛濛石  
巉巖兮橫路風颯颯兮吹松雲冥冥兮雨霏霏白猿  
嘯夜兮青楓朝日出兮林間澗谷紛以青紅千林靜  
兮秋月百草香兮春風嗟世人兮曷不歸來乎山中  
山之樂不可見兮子其往兮誰從其三梯崖構險  
兮佛廟仙宮耀空山兮鬱穹窿彼之人兮固亦目明

而耳聰寵辱不干其慮兮仁義不被其躬蔭長松之  
翦蔚兮藉纖草之丰茸苟其中以自足兮忘其服胡  
而顛童自古智能魁傑之士兮固亦絕世而逃蹤惜  
天才之甚良兮而自棄於無庸嗟彼之人兮胡為老  
乎山中山中之樂不可久遲子之返兮誰同蓋公惜  
其才而將引之以歸儒也勤既瀕行而公復作詩送  
之云越俗僭宮室傾貲事彫牆佛屋尤其侈耽耽擬  
侯王文彩瑩丹漆四壁金焜煌上垂百寶蓋宴坐以

方床胡為棄不居棲身客京坊辛勤營一室有類燕  
巢梁南方精飲食筍笋鄙蒸羊飯以玉粒粳調之甘  
露漿一饌費千金百品羅成行晨興未飯僧日昃不  
敢嘗乃茲隨北客枯栗充饑腸東南地秀絕山水澄  
清光餘杭幾萬家日夕焚清香煙霏四面起雲霧雜  
芬芳豈如車馬塵鬢髮染成霜三者孰苦樂子奚勤  
四方乃云慕仁義奔走不自遑始知仁義力可以治膏  
肓有志誠可嘉及時宜自強人情重懷土飛鳥思故鄉

夜枕聞北鴈歸心逐南檣歸兮能來否送子以短章  
惠勤惠思者皆居孤山蘇子瞻倅郡以臘日訪之作詩  
云天欲雪雲滿湖樓臺明滅山有無水清石出魚可  
數林深無人鳥相呼臘日不歸對妻孥名尋道人寔  
自娛道人之居在何許寶雲山前路盤紆孤山孤絕  
誰肯廬道人有道山不孤紙窗竹屋深自煖擁褐坐  
睡依圓蒲天寒路遠愁僕夫整駕催歸及未晡出山  
回望雲水合但見野鵲盤浮屠茲遊淡泊歡有餘到

家恍如夢遽遽作詩火急追亡逋清景一失後難摹  
此詩惟孥遽二韻艱澁而公三疊之一曰追胥連保  
罪及孥者言府中屢獲鹽徒連逮保甲也知非不去  
慚衛遽者言年老宜休不若遽伯玉也二曰君恩飽  
煖及爾孥者言居官厚祿得以遊遨也莫惜錦繡償  
管遽者言李寺丞屬和富於詞藻關險不窮也三曰  
四方宦遊散其孥者言錢王之敗子孫離析也遂起  
義皇傲兒遽言優游自適得為太古閒民也原韻孥

字乃東方朔臘日早歸之事後作雖多終屬牽強  
蘇子瞻佐郡日與僧惠勤惠思清順可久惟肅義詮為  
方外之交嘗同泛西湖有詩云三吳雨連月湖水日  
夜添尋僧去無路漱漱水拍簷鴛言徂北山得與幽  
人兼清風洗昏翳晚景分濃纖縹緲朱樓人斜陽半  
踈簾臨風一揮手悵焉起遐瞻世人驚朝市獨向溪  
山廉此樂得有命輕薄神所殲

叅寥者於潛人出家智果寺其見知於東坡也以臨平

絕句宗婦曹夫人者善丹青遂作臨平藕花圖當時  
崇誦可知矣其他小詩亦清新可賞其詩云風蒲獵  
獵弄輕柔欲立蜻蜓不自由五月臨平山下路藕花  
無數滿汀洲湖上晚歸詩云漾舟歸路興何賒水木  
低涼一道斜菱蔓蒹葭都卷盡芙蓉爛漫獨開花又  
云雲披霞捲仰昭回試望翻經古石臺應有秋香生  
桂樹吹風肯傍暮船來訪勤上人詩斷橋蒼壁倚溪  
斜赤葉楓林噪晚鴉可怕嶺雲埋徑路會尋流水到

君家戲招李無悔秀才詩淋離一雨過秋山洗出西  
湖小霽天炯炯魚鱗含倒影飄飄羊角卷荒阡野塘  
白芡珠盈斗幽浦紅蕖錦繞船冷炙殘盃當已厭好  
來波際弄嬋娟次韻吳承老推官觀開西湖詩偉人  
謀議不求多事定紛紛自唯阿盡放龜魚還綠淨肯  
容蕭葦障前坡一朝美事誰能紀百尺蒼厓尚可磨  
天上列星當亦喜月明時下浴晴波如此數首庶幾  
能遠塵俗者

祥殊嗜蜜思聰嗜琴東坡詩所謂招得琴聰與蜜殊者  
是也仲殊善詞而小調尤勝如訴衷情詠西湖云湧  
金門外小瀛洲寒食更風流紅船滿湖歌吹花外有  
高樓晴日暖淡烟浮恣嬉遊三千粉黛十二闌干一  
片雲頭念奴嬌詠荷花云水楓葉下乍湖光清淺涼  
生商素西帝宸遊羅翠蓋攤出三千宮女絳綵嬌春  
鉛華掩畫占斷鴛鴦浦歌聲搖曳浣紗人在何處別  
岬孤負一枝廣寒宮殿冷寒棲愁苦雪艷冰肌羞淡

泊偷把胭脂勻注媚臉籠霞芳心泣露不肯為雲雨  
金波影裏為誰長恁凝竚又詠夏景云故園避暑愛  
繁陰蔽日流霞供酌竹影篩金泉漱玉紅映薇花簾  
幙素質生風香肌無汗綉扇長閒却雙鸞棲處綠筠  
時下風箏吹斷舞影歌聲陽臺人去有當年池閣佩  
結蘭英凝念久言語精神依約燕別雕梁鴻歸紫塞  
音信憑誰把爭知好景為君長是蕭索此僧風流蘊  
藉不減少年然恐非蓮社本色也

思聰為行童日東坡倅杭州令和參寥子昏字詩聰立  
成有千點亂山橫紫翠一鉤新月掛黃昏之句東坡  
大稱賞大觀政和間聰挾琴遊梁日登中貴人之門  
久之遂還俗為御前使臣方其將冠巾也蘇叔黨因  
浙僧入都送之詩云試誦北山移為我招琴聰詩至  
已無及矣

辯才參寥皆蘇子瞻友也其贊辯才云即之浮雲無窮  
去之明月皆同欲知明月所在在汝吐霧之中其贊

參寥云身寒而道富辯於文而訥於口外厓柔而中  
健武與人無競而好刺譏朋友之過枯形灰心而喜  
為感時翫物不能忘情之語此予所謂參寥子不可  
曉者五也觀此則二僧之優劣可見矣子瞻謫齊安  
參寥不遠二千里相從暮年子瞻謫南海參寥欲泛  
海訪之子瞻以書戒止會當路亦摘其詩有譏刺語  
遂返初服建中靖國初曾肇言其非辜復祝髮觀其  
友義如此亦幾於近道者

辯才元淨之住天竺也善持呪水飲病者輒愈杭人尊  
事之熙寧九年秀州嘉興縣令陶彖有子得疾甚異  
形色語笑非復平人令患之乃大出錢財聘謁巫祝  
厭勝百方終莫能治辯才適以事至秀州令素聞其  
名即馳詣告曰兒始得疾時見一女子自外來相調  
笑久之俱去少行至水濱遺詩曰生為木外人死作  
幽獨鬼泉門長夜開衾幃待君至自是屢來且有言  
曰仲冬之月二七之間月盈之夕車馬來迎今去妖

期逼矣未知所處願賜哀憐辯才許諾因杖策從至  
其家除地為壇設觀音像於中央取楊枝霑水洒而  
呪之三遶壇而去是夜兒寢安然明日復來結跏趺  
坐引兒問曰汝居何地而來此答曰會稽之東下山  
之陽是吾之宅古木蒼蒼師又問汝姓誰氏答曰吳  
王山上無人處幾度臨風學舞腰師曰汝柳姓乎乃  
輒然而笑師良久呵曰汝無始已來迷已逐物為物  
所轉溺於淫邪流浪千劫不自解脫入魔趣中橫生

災害延及無辜汝今當知魔即非魔魔即法界我今  
為汝宣說首楞嚴秘密神呪汝當諦聽訟既往過愆返  
本來清淨覺性於是號泣不復有云是夜女子謂兒  
曰辯才之功汝父之虔無以加焉吾將去矣久與子  
遊情不能遽舍願舉一觴為別因相對引滿既罷作  
詩云仲冬二七是良時江下無緣與子期今日臨岐  
一杯酒共君千里遠相離遂去不復見

佛印禪師者杭之蠟燭菴聖水寺皆其道場也世傳其

詆諧滑稽而僧史亦眇其人不為列傳東坡貶惠州  
時佛印致書云子瞻負高材遠放寂寞之濱權臣忌  
子瞻為相耳人生如白駒過隙三二十年功名富貴  
轉眼成空何不一筆都勾尋取本來面目子瞻讀書  
萬卷而未知性命所居不可謂之聰明也努力向前  
珍重珍重觀此書亦似乎近道者惜渠所謂性命之  
旨無從質難之耳

佛印好詆諧時有殿巖王觀父邀禪師說法禪師升座

唱云此一瓣香為掃烟塵博士護世界天王殺人  
不眨眼上將軍立地成佛大居士王公大喜以其久  
多專殺也

大通禪師者操律高潔人非齋沐不敢登堂東坡一日  
挾妙妓謁之大通愠形於色公乃作南歌子一首令  
妙妓歌之大通亦為解頤公曰今日參破老禪矣其  
詞云師唱誰家曲宗風嗣阿誰借君拍板與門槌我  
也逢場作戲莫相疑溪女方偷眼山僧莫眨眼却愁

彌勒下生遲不見老婆三五少年時

蘇子瞻九日尋臻閣黎遂泛小舟至惠勤師院詩云白  
髮長嫌歲月侵病眸兼怕酒盃深南屏老宿閒相訪  
東閣郎君懶重尋試碾露芽烹白雪休拈霜蕊嚼黃  
金扁舟又截平湖去欲訪孤山支道林

雲閣黎者居寶山蘇子佐郡遊寶山偶入方丈小院間  
然有僧隱几低頭讀書與之語漠然不對問其隣僧  
曰此雲閣黎也不出十五年矣不數月卒蘇子再往

訪之弔以詩云雲師來寶山一住十五秋讀書常閉  
戶客至不舉頭去年造其室清坐忘百憂我初無言  
說師亦無對酬今來復扣戶空房但颺颺云已滅無  
餘薪盡火不留却疑此室中常有斯人不所遇孰非  
夢事過吾何求

皎如晦者淨慈寺僧也嘗作卜算子詞云有意送春歸  
無計畱春住畢竟年年用着來何似休歸去目斷楚  
天遙不見春歸路風急桃花也似愁點點飛紅雨

重喜者會稽人為僧錢唐少捕魚不識字忽能通佛書  
作偈頌嘗云地爐無火一囊空雪似楊花落歲窮乞  
得苧麻縫敗衲不知身在寂寥中其解悟如是

高麗寺輪藏甚偉宋時高麗國進金字藏經一部貯其  
中到今猶有存者其原起於傅大士以經目繁多人  
或不能遍閱乃就山中建大層龕一柱八面實以諸  
經運行不碍謂之輪藏人有發菩提心者推轉是輪  
即與持誦諸經無異故今天下輪藏皆設大士像

宋時西湖多詩僧熙寧間有清順字怡然可久字逸老  
所居皆湖山勝處而清順尤約介不妄交人無大故  
不入城市士夫有以米粟饋者受不過數斗盜貯几  
上日取二三合啖之蔬笋之供恒缺乏也東坡一日  
遊西湖僧舍壁間見小詩云竹暗不通日泉聲落如  
雨春風自有期桃李亂深塢問誰所作或以清順對  
即日求得之聲名頓起

妙應者江南人宣和中往來京洛間能知人休咎佯狂

奔走飲酒食肉不拘戒行人呼之為風和尚蔡元長  
奪職居錢唐一日直造其堂書云相得端明似虎形  
搖頭擺腦得人憎看取明年作宰相舞爪張牙喫衆  
生又書云衆生受苦兩紀都休已而悉如其言其越  
人姚令聲者在上庠日妙應語之曰君不見令終端  
午日伍子胥廟中見石榴花開則奇禍至矣令聲初  
任杭州監稅三載不敢登吳山後調江山令來叅帥  
憲出城數里風雨暴至憩路傍小廟中見榴花盛開

詢之祝史云此伍子胥廟也其日乃五月五日令聲  
愴然未幾秦檜以宿怨追赴大理死

孝宗幸天竺及靈隱有僧淨輝者隨侍上見飛來峰問  
輝曰既是飛來如何不飛去對曰一動不如一靜又  
看觀音手持數珠問曰何用曰念觀音菩薩問自念  
則甚曰求人不如求己孝宗大喜

賈似道當國一日退居湖山有蜀僧襍褸徘徊賈問之  
曰汝為何僧對曰某詩僧也似道見湖中有漁翁遂

命賦之僧請韻賈以天字為韻僧應口對曰籃裏無  
魚欠酒錢酒家門外繫漁船幾回欲脫蓑衣當又恐  
明朝是雨天賈喜厚贈之

濟顛者本名道濟風狂不飭細行飲酒食肉與市井浮  
沉人以為顛也故稱濟顛始出家靈隱寺寺僧厭之  
逐居淨慈寺為人誦經下火累有果證年七十三歲  
端坐而逝人有為之贊曰非俗非僧非凡非仙打開  
荆棘林透過金剛圖眉毛厮結鼻孔撩天燒了護身

符落紙如雲烟有時結茅宴坐荒山巔有時長安市  
上酒家眠氣吞九州囊無一錢時節到來奄如蜣蟬  
湧出舍利八萬四千贊嘆不盡而說偈言嗚呼此其  
所以為濟顛也耶今寺中尚塑其像

楊廷秀贈抄經頭陀詩云刺血抄經奈若何十年依舊  
一頭陀袈裟未着言多事着了袈裟事更多又有住  
山僧者或謀攘之僧乃掛草屨一雙於方丈前題詩  
云方丈前頭掛草屨流行坎止任安排老僧腳底從

來闊未必枯骸就此埋愚謂前一詩可為士人筮進  
解褐之規後一詩可為士人勇退抽簪之法

溫日觀者宋亡出家瑤瑤寺豪飲不羈往往出憤世語  
善畫葡萄枝蔓皆合草書法時寫詩文於上嘗在朱  
宣慰家作畫訖遂寫一詩云昔有朱買臣今有朱宣  
慰兩個擔柴夫並為金紫貴朱雖武夫然雅敬日觀  
軒然笑曰我果然曾賣蘆柴和尚知我遂厚酬之日  
觀酷嗜酒楊總統以名酒啗之終不濡唇見輒罵曰

掘墳賊惟鮮于伯機重之日觀時至其家索飲醉即  
抱前榮支離叟或歌或哭支離叟者伯機庭前松樹  
也每索湯浴伯機必躬進澡豆吳立夫嘗題其所畫  
葡萄云佛者本西域葡萄亦來西柰何此善畫無復  
渠所攜我曾考其故初與漢使偕上林乃有館蔥嶺  
何須梯天時自不同地氣忽以迷結子且磊磊懸藤  
更高低先幾日已露薄德不及稽終令白氎像遠從  
雙狻猊從茲故國木伴爾禪家棲幽心恍有得爛墨

研為泥快哉一揮灑遽若無町畦依稀可少辨變作  
天投蛻萬古空朔色南山竟朝躋畫工尚逸品遊戲  
從筌蹄豈伊吾無人何往非耄倪豈伊吾無物桃李  
總成蹊此皆外所產敢與中州齊為爾撫此卷長歌  
欲驚嘶凌雲翰題日觀墨葡萄云風飄露灑一棚秋  
路入滄江憶舊遊憑仗金壺翻墨汁老禪胸次有涼

州

德祥者號止庵仁和人故宋時為僧涉元屬念舊國其

風雨詩云風雨閉門三十日年光虛度一分春淒涼  
舊國鶯花夢白髮江南有幾人聽雨詩云半夜思家  
夢裏愁雨聲落落屋櫺頭照泥星出依前黑淹爛庭  
花不肯休望月詩云中庭地白樹棲鴉冷露無聲濕  
桂花今夜月明人盡望不知秋色落誰家止庵持戒  
律書法擅名一時詩刻苦高逼郊島所著有桐嶼集  
原妙者號高峰吳江人出家淨慈寺立三年死限學禪  
年二十二請益斷橋倫倫令參生從何來死從何去

話於是脇不至席口體俱忘或如廁惟中單而出或發函忘扇鐻而去時雪巖欽寓北礪塔欣然懷香往扣之方問訊即打出閉門再往始得就近欽忽然罵曰阿誰與你拖箇死屍來聲未絕即打如是者不知其幾高峰禮扣愈虔忽覩五祖演和尚真讚云百年三萬六千朝反覆元來是這漢驀然打破拖死屍之疑明日詣欽又問阿誰與你拖箇死屍來拈捧便打高峰喝住曰今日却打某不得拂袖便出欽更問萬

法歸一一歸何處高峰云狗舐熱油鐺自是機鋒不讓遂登天目山獅子巖結廬終身焉

明本者錢唐人姓孫氏幼好梵唄結趺坐長則出家吳山聖水寺時有高峰原妙禪師居天目山獅子巖立死關以待叅學明本往叩之師欣然知為大器也久之明本誦金剛經恍有開解者謂識量依通雖於義趣通解終非悟也已而難染給侍死關晝服力役夜事禪定十年而學成豁然超脫宗旨別傳九流諸子

罔不淹貫激揚提唱機鋒翕霍圓轉不窮時稱大辯  
焉號中峰有廣錄三十卷元元統二年詔收入佛藏  
揭傒斯為之序有塔院在聖水寺故宋宮人楊妙錫  
以明本祝髮貯以香函數年生舍利五十餘顆瘞之  
塔下

明本善吟咏趙子昂與之友學士馮子振甚輕之一日  
子昂偕明本訪子振子振出示梅花百韻詩明本一  
覽走筆和之子振猶未以為然明本亦出所作九字

梅花歌以示子振子振竦然遂與定交其歌云昨夜  
西風吹折千林梢渡口小艇滾入沙灘圻野橋古梅  
獨卧寒屋角疎影橫斜暗上書窗敲半枯半活幾箇  
蓓蕾欲開未開數點含香苞縱使畫工竒妙也縮  
手我愛清香故把新詩嘲

宋時僧家以四月十五日結制安居刹院不敢起單雲  
遊建楞嚴會每日誦經修懺朝廷降賜金帛檀信隨  
喜施助無虛日至七月十五日設齋解制謂之法歲

周圓

高峰和尚結制示衆云封却拄杖頭結却布袋頭大家  
團欒頭赤眼火柴頭噯正是冤家共聚頭不妨頭上  
更安頭以拄杖打散又中夏示衆云前四十五日何  
處去焦尾大虫入鬧市後四十五日何處來三腳驢  
子上高臺俊鷹快鷄便須乘時跛鼈盲龜徒勞踣跳  
又解制示衆云九旬把定繩頭不容絲毫走作弄得  
箇箇皮穿骨露七零八落冷眼看來正謂掘地討天

千錯萬錯今日到這裏不免放開一線彼此無拘無  
束東西南北任運騰騰天上人間逍遙快樂然雖如  
是且道忽遇鑊湯爐炭劍樹刀山未審何如棲泊良  
久云惡

中峰和尚結制示衆云大衆踞菩薩乘修寂滅行以大  
圓覺為我伽藍身心安居平等性智此是二千年外  
老釋迦畫地為牢與當時衆比丘禁足安居之古制  
也今朝四月十五適當聖制之辰拈出陳年歷日頭

為諸人因行掉臂去也前面一絡索且置之不論復如何是安居平等性智然性智平等故盡十方刹土更無有不平等者仰觀諸佛俯視衆生是謂性相等前觀過去後及未來是謂三際平等諸戒定慧及嬌怒癡是謂一念平等迷而生死悟而涅槃是謂不動平等大而虛空細而纖芥是謂離相平等乃至見色色平等聞聲聲平等審如是則四月十五結結亦平等七月十五解解亦平等於中九十日日日平等

時時平等念念平等政與麼時喚甚麼作結喚甚麼作解喚甚麼作安居不安居黃面老漢到這裏不覺全機敗露雖然事無一向你若不曾真正向平等性智中腳踏實地穎悟一向真饒將平等二字盡虛空充塞殆遍無乃益其高下耳此事只恁麼說不過須是硬曝曝地向此九十日於無義味話上橫敲豎敲朝挨暮挨到極處敲到盡時如啞子得夢恁時不妨任意指陳喚平等作不平等亦得喚不平等作平

等亦得所謂我為法王於法自在記得古人有偈謂  
護生須是殺殺盡始安居會得箇中意鐵船水上浮  
莫是殺生與護生一念平等麼恁麼商量瞎人眼目  
甚非細事更聽說偈各自歸堂九旬禁足意何殊生  
殺難將古制拘未到身心平等處豈應容易白安居  
又中夏示衆云大衆四十五日前朝昏沉暮散亂四  
十五日後朝散亂暮昏沉政當今日在四十五日之  
中試把昏沉散亂來與老僧看既無你拈出處則真

如菩提涅槃解脫亦無你拈出處莫說你拈不出便是大寂定中喚起二千年外釋迦老漢來敢保其亦無拈出之理既拈不出你喚甚麼作昏散又喚甚麼作寂照直下聖凡情盡能所障空觀體無依當機絕待不見四十五日在前不見四十五日在後三除平等一道虛閒即今覓箇中夏亦不可得雖然此猶是途路中事若曰到家消息猶較西天十萬程諸禪德你最初立志要為生死大事不是說了便休須發起

一片不顧生不顧死底決定志氣也不管你前四十  
五後四十五正當四十五不四十五硬曝曝地提箇  
所叅話任你說是說非論長論短拍盲舉起拍盲打  
捱誰管今生打得徹打不徹直饒以熱鐵輪驅入刀  
山劍樹上一日走百千萬億匝要教他所叅話須臾  
放下終不可得有此等志氣欲超過佛祖為不難矣  
從前做不到古人地位只是氣願不真切立脚不穩  
當所以古人道過河須用筏學道須立志釋迦彌勒

初無所長只是箇能立志願底凡夫耳昔僧問古德  
一念不起還有過也無德云須彌山且道與趙州青  
州布衫相去何如此去四十五日後却來露箇消息  
又解制示衆云臨濟喝得口破德山捧得手折雪峰  
是甚麼雲門乾屎橛千七百箇老骨撾開口重重納  
敗闕爭似幻住一夏九十日無禪可叅無法可說把  
箇無義味話拋在諸人面前指鹿為馬證龜成鼈逗  
到今朝靈驗全無露柱燈籠與禪板蒲團互相歡悅

驚起目捷連尊者忍俊不禁鐵錫敲開地獄門刹那  
滅却阿鼻業諸禪德還知麼此事且置九十日內謂  
之禁足謂之護生謂之安居謂之聖制一日鉢盂兩  
度濕畢竟為箇甚麼古教謂迷之則生死始悟之則  
輪回息然悟之則不復與論既曰未悟決定是迷迷  
之則無常生死念念開端塵塵肇始恒河沙劫出沒  
昇沉卒未有了日在無常殺鬼誰管你山中坐夏來  
莫說與麼坐一夏你若不精勤勇猛如救頭然曲循

世情橫生妄見披襟間謔曳履高心漁獵古今虛延  
歲月似與麼過得百千萬億夏惟長業輪全虧道用  
今日九旬制滿三月功圓被人問著水牯牛作麼生  
糊獠子作麼生只與未結夏前宛爾無異豈不孤他  
佛祖垂教天龍擁護檀信供給王臣加被者哉在今  
日事不獲已更與諸人展箇寬限初發心為生死入  
道之日即是結制於中也不論九十日九十月九十  
年但念念不退轉念念不間斷念念不休息念念不

棄離叅之究之決之擇之直至心空及第脫畧見聞  
打破漆桶之頃便是解制之日也你不見古教謂如  
一衆生未成佛終不於此趣泥洹這箇說話固是悲  
願弘深殊不知綿裏之刺蜜中之砒直是惱人懷抱  
大丈夫或不起此一期透脫自甘流浪豈理然哉記  
得僧問趙州萬法歸一一歸何處州云我在青州做  
一領布衫重七斤謾陳一偈以遣時緣七斤衫重出  
青州老趙州禪觸處周聖制九旬今日滿杖藜千里

又驚秋

陳雲嶠者泗州人陳平章之孫也個儻不羈人稱為陳  
顛至元五年為餘姚州同知就醫於杭寓赤山重陽  
日楊太史瑀邀張伯雨訪之偕遊水樂洞雲嶠自言  
前身泗州寺僧也戒行精嚴人呼為老佛一日呼侍  
者作血臟羹侍者曰老佛一世持齋何故思此老佛  
怒而去見陳平章曰我特索血臟羹平章亦以一世  
持齋為勸老佛怒曰原來也是不了事漢平章不得

已作羹啖之歸寺別大眾而作偈曰撞開平屋三層  
土踏破長淮一片冰趺坐而逝昇龕至淮河時冰合  
已久茶毗之際大震一聲河水自裂陳平章閒坐廳  
事恍見老佛入堂中追問之則子舍已報誕子即我  
也明日伯雨送登高詩有云百年身付黃花酒萬壑  
松如赤脚冰楊太史和云方外弟兄存晚節人間富  
貴等春冰雲嶠笑曰我無冰字只有長淮一片冰耳  
明日雲嶠告殂蓋亦談破轉世之證也

元時有僧至慧出家餘杭徑山寺鉢積既充復欲還俗  
乃作詩云少年不肯戴儒冠強把身心赴戒壇雪夜  
孤眠雙足冷霜天削髮獨頭寒朱樓美酒應無分紅  
粉佳人不許看死去定為惆悵鬼西天依舊黑漫漫  
椿大年者吳中大族以詩名叢林中遊錢唐南北兩峰  
詩最多嘗以詩謁楊廉夫云揚雄宅外好修竹黃妃  
塔前多翠微自愛高文每相見莫怪短筇來扣扉  
守仁一初者靈隱寺僧也少從楊廉夫遊善歌詩字亦

適勁與張伯雨友善嘗題石鱗泉詩云神鼇驅水到  
禪家清出龍泓味更佳晴帶浦雲穿曉蘄暗隨山雨  
走寒沙玉臍圓映波心月瓊沫香浮沼面花擬待春  
風招社客焚香來試九溪茶冲漠軒詩云大化浩無  
迹藐馬同太虛靈扁鑰一啓萬境遂紛如乾坤豁兩  
戶日月跳雙珠飛光不暫駐倏忽朝已晡真人秉化  
機燕坐究玄樞宴心太始間身與造化俱撫弄盤古  
頂蹴躡康胡雛澹然樂無為笑傲混沌初哭楊廉夫

詩云玉笙聲斷泣龍君撼樹蚍蜉謾作羣一代春秋  
尊正統兩朝冠冕在斯文他生有約尋圓澤後世何  
人識子雲舊業門生知幾在下車空拜馬陵墳題張  
伯雨初陽臺唱和卷詩笙管聲沉彩鳳飛朝陽出海  
散晴暉一時文物推延祐五夜丹光起太微歲月無  
情詩卷在江山如故昔人非祇應湖上梅花月照見  
荒臺獨鶴歸洪武間徵授僧錄右善世所著有夢觀

集

來復見心者豐城人從笑隱於中竺洪武初以高僧徵  
仕至左覺義有詩名所著有蒲庵集嘗陪黃晉卿學  
士遊天竺詩湧金門外小瀛洲暇日同陪使節遊五  
竺山高雲樹曉三江風急雪濤秋說經曾記僧名辯  
題句還聞寺姓劉祇合汎湖依釣艇六橋烟水看閒  
鷗桂子巖前秋氣新老禪畱客道情真漫論圓澤三  
生舊自信曹溪一派親明月盡隨金地影白雲閒伴  
玉堂身丹青若寫東林社添我松巢作近隣鷲峰對

雪詩玉龍顫曉朔雲屯滕六吹花積厚坤凍合洪河  
天不夜光吞大地月無痕消冰成水應能辯會色歸  
空孰與論老我難禁寒徹骨一巖松火喜春溫去年  
旅寓北山陰踏雪草堂三尺深紫禁有詩曾應制少  
林無法可安心梅花月霽僧初定芋火烟寒客獨吟  
今日南歸重回首天光如對閬風岑又西湖絕句六  
首芙蓉灣口綠陰斜吹笛何人隔綵霞驚起沙頭雙  
翠羽銜魚飛上刺桐花流觴亭子鳳山阿都護行春

小隊過笑擲金錢花底醉玉箏彈出白翎歌寶網金  
幢變劫灰瞿曇寺裏盡蒿萊鳥巢無樹山夔泣不見  
談禪太傅來雨後湖堤樹色寒杏花風颺酒旗竿紅  
船載月無絲竹野水疎籬正好看蜃霧初消海日升  
隔江山色是西陵潮生潮落無今古似與人間說廢  
興西泠橋下水生烟屬玉飛來近釣船荒盡梅花三  
百樹孤山何處訪逋仙一夢老人詩高卧蓬萊最上  
峰希夷獨許往來同三生風月形骸外百歲乾坤寤

寐中槐樹雨涼秋袂薄梨花風暖夜床空黑甜自足  
平生願不管東窗曙色紅詩巢詩雅頌千篇插架齊  
高情渾似浣花溪鳳銜錦字朝還集鶴怪文光夜不  
棲辟采香芸除舊蠹補添紅葉認新題自從刪後醇  
風變厭聽喧啾百鳥啼卧雪齋詩雪滿空山歲月遷  
冷齋獨卧廣文壇白依太素無塵地夢入通明不夜  
天碧盃茶香清瀾乳紅爐木火煖生烟諸兒幸免號  
寒訴枉駕何須郡守憐先生卧雪嬾謀身不肯干時

只任貧簾捲空明孤榻曉窻寒虛白一窩春梅花帳  
外寒聲急竹葉樽前歲事新曾憶朝回鵲近水晶  
光動玉龍鱗偶興絕句詩黃金堆屋只嫌貧飽食何  
曾厭八珍欲把長繩繫白日乾坤誰是百年人崑崙  
懸水立黃河吼地流來萬丈波若比人心應更險笑  
中無奈暗操戈

復見心洪武間徵入京師其師欣笑隱止之曰上苑亦  
無頻婆果且畱殘命喫酸梨復不聽後竟坐法論死

臨刑而悔且道師語上命併逮欣將殺之欣曰此故  
倡臣偶舉之非有他也上問出何經欣曰出大藏某  
錄某函某卷第幾頁命檢視之果然乃釋之見心在  
當時與諸縉紳友善張仲舉贈之詩云蓮花峰下大  
香樹吹老西風幾度秋僧寶師真洪覺範詩窮我亦  
孟叅謀文章宇宙千年事身世江湖萬里舟甚欲相  
期石橋路更須同訪羽人丘又云自入赤墀青瑣間  
舊遊禪侶亦闌珊青山只憶招提境白首初辭供奉

班馬為空羣猶矯矯鳥能求友自關關終期一舸相  
尋去知在桃溪第幾灣又云見說錢唐別築城淒涼  
風景若為情湖堤柳盡曾遊路石壁苔荒舊刻名老  
我無能如燭武何人可飲勝公榮沃洲勝會還容續  
即擬山中隱計成高季迪和見心兼簡初禪師詩云  
高堂鐘鼓毒龍驚曾布袈裟海上城廬岳禪師傳法  
印道園學士許詩名幾超北闕瞻天近獨坐南屏對  
月明書到喜聞雙徑老雨華新散滿瑤京

大欣笑隱者南昌人住中竺有學行研窮教典旁貫百  
家所著有蒲室集元文宗召赴闕特賜三品文階張  
伯雨贈之詩云緇經臺畔惜分攜華蓋峰前幾夢思  
一席地分眠鹿草三更月在掛猿枝我書安能半袁  
豹君才端倍十曹丕上番相逢虞秘監不嫌頻竄仰  
山碑一日省相請笑隱看潮其日寺火時恩斷江住  
虎丘寺同日災有僧為詩戲之曰欣哉笑隱住中峰  
本是鴻儒學說空羅刹江頭潮未白稽留峰下火先

紅青霄有路干丞相紺殿無顏見大雄若使斷江知  
此意兩人握手泣西風

如蘭古春者富陽人善相術于肅愍公少時博戲市中  
古春撫其背曰少年何不自愛異時撥亂救世之宏  
才也時有道人在傍古春既去道人呼反之曰汝相  
如斯而已乎古春更熟視之曰不得考終道人首肯  
曰和尚可教矣古春問其姓名居處道人笑而不言  
懇扣之紹曰暫寓福田寺翌日訪之竟無有也

淨慈寺有閣憑虛而出可瞰全湖天順間學士錢公溥  
題詩倡腰橋二韻和者百餘皆未穩帖嘉靖間僧法  
聚者號玉芝海鹽人和云大堤迴接鳳山遙金勒東  
風細馬驕芳草不知埋帝鳥柳枝猶自學宮腰天空  
水月三千頃春老鶯花十二橋聞說樓船醉年少平  
章獨免紫宸朝蓋西湖水面凡三千八百畝而裏外  
六橋於湖景最切所云年少平章蓋指賈似道也

西湖遊覽志餘卷十四